

Ukiuortumik akileraarnermut allagartamut nassiussinermi ilanngussatut akileraarutit procentingorlugit kommunini Namminersorlutillu Oqartussat ataani susassaarfinnut sorlernut tamakkiisumik aningaasartuutit procentingorlugit takussutissaqalernissaat pillugu Naalakkersuisut peqquneqarnissaannut Inatsisartut aalajangiiffigisassaattut siunnersuut.
(Inatsisartunut ilaasortaq Aqqalu C. Jerimiassen, Atassut)

Akissuteqaat

(Aningaasaqarnermut Naalakkersuisoq)

Siullermeerinnineq

Aallaqqaammut Aqqalu C. Jerimiassen, Atassummeersoq qutsavigissavara ingerlatsiviit innuttaasullu paasinninnerisa akuunerisalu ersarinnerulersinneqarnissaanik siunertaqartumik siunnersuuteqarmat.

Siunnersuutip innuttaasut ataasiakkaat akileraarutitut akiliutaasa qanoq atornerarannik paasissutissinneqartarannik oqilisaassinissamik siunertaqarpoq. Innuttaasullu aningaasaatimik illersorneqarsinnaasumik Kalaallillu Nunaata ineriartorneranut qulakkeerinnittumik atornerarannik tatiginninnerat Naalakkersuisut soqutigisaraat. Siunnersuutip siunertaa isumaalu Naalakkersuisut paasilluarpaat.

Siunnersuutilli piviusunngortinneqarnerani ilungersornarsinnaasut arlallit Naalakkersuisut erseqqissaassutigissavaat.

Akileraarutitut akiliutit siunnersuuteqartup nassuiaaneratulut pisariitsigisumik innuttaasup akiliineraniit kommunini atuinerlutik malinnaaffigisinnaaneratulut ajornarpoq. Akileraarutitut akitsuutinillu isertitat, isertitanut allanut akuliukkaangamik allaaneq ajorput kuuit ataatsimoortunngorlutik kuussuanngunnerat. Kuuk supiffimminut anngukkaangami – tassa Namminersorlutik Oqartussat kommunillu aningaasartuuteqaraangata – imeq imaluunniit isertitat sumingaanneernerat apeqqutaaneq ajorpoq.

Isertitali ataatsimoortut takussutissinneqarsinnaaneratulut ajornanngilaq. Aamma aningaasartuutit ataatsimut. Namminersorlutik Oqartussani kommunillu ataasiakkaani. Taakku nalunaarsuiffinni imaluunniit titartakkatut procentilersukkanut takussutissiarineqarsinnaapput. Naak taamaaliorneq paasissutissiisuugaluartoq, paasissutissat pingaarnersiugaassapput innuttaasumullu ataasiakkaamut annertunerusumik pissarsissutaassanatik. Akileraarnermut uppernarsaatit nassiussorneqartarnerisa nalaanni Namminersorlutik Oqartussat kommunillu aningaasaqarneratulut pillugu kisitsisit nutaat pissarsiarineqarsinnaaneratulut ajornarpoq. Taamaalillunilu kisitsisit nutaanngitsut nassiussorneqassapput.

Kommunini Namminersorlutillu Oqartussani pisortat aningaasartuutaat pillugit paasissutissat taakku nittartakkakut qupperneranni kikkunnilluunniit takuneqarsinnaalereersut, siunnersuuteqartup nammieerluni tikkuarpaa.

Taamaammat ataatsimut isigalugu siunnersuutip piviusunngortinnera siunnersuuteqartup neriuutigisaatut sunniuteqassanersoq Naalakkersuisut qularaat.

Akerlianilli siunnersuut naqiterinermut nassiussuinernullu aningaasartuuteqarnerulersitsissaaq. Tamanna allakkanik qarasaasiakkut allakkerivikkullu nassiussuinermi assigiimmik sunniuteqassaaq. Nassiussuinermit aningaasartuuteqarneruneq innuttaasumut ataatsimut agguaqatigiissillugu 5 koruunit angullugit annertussuseqalersinnaavoq. Taassumalu saniatigut paasissutissanik suliaqarnermut, taakkulu paasiuminartunngorsarnerannut nukinnik atugassanngortitsisoqassaaq. Siunnersuummut ukiumoortumik aningaasartuutit 350.000 koruunit missaannik annertussuseqassasut Naalakkersuisut missingerpaat, tamannalu ukiuni sisamani aningaasanut inatsisiliornermi 1,3 mio. koruuninik naleqassaaq. Aningaasartuutit taakku Akileraartarnermut Aqutsisoqarfimmit aningaasartuutigineqartariaqassapput, tassanilu maanna siunertamut matussusiissutissanik aningaasaliissuteqanngilaq.

Pitsaaqutit annertugisassanngitsut illuatungaani aningaasartuutitut oqimaalutareerlugit Naalakkersuisut siunnersuutip itigartitsissutigineqarnissaa inassutigaat.